



নিজের পরিচালনায় এবার নায়িকা মৌসুমী

মৌসুমী পরিচালিত তৃতীয় সিনেমা 'শূন্য হৃদয়'। এ সিনেমায় মৌসুমী নিজেই নায়িকার চরিত্রে অভিনয় করবেন। ত্রিভুজ প্রেমের কাহিনী নিয়ে গড়ে ওঠা এ সিনেমায় মৌসুমীর বিপরীতে অভিনয় করবেন নবাগত আসিফ ও ফেরদৌস। ইমপ্রেস টেলিফিল্মের ব্যানারে নির্মাণাধীন সিনেমাটির প্রধান সহকারী পরিচালক হিসেবে কাজ করছেন মৌসুমীর ছেলে ফারদীন এহসান স্বাধীন।

অ্যাক্টর অব দ্য ইয়ার হলেন বেনেডিক্ট কাম্বারব্যাচ

এ বছরের জিকিউ অ্যাওয়ার্ডে অ্যাক্টর অব দ্য ইয়ার পুরস্কার জিতে নিয়েছেন বেনেডিক্ট কাম্বারব্যাচ। সম্প্রতি জিকিউর ২০১৪ আসরে তার হাতে এ পুরস্কার তুলে দেয়া হয়। এবারের জিকিউ আসরে ফিলানথ্রোপিষ্ট অব দ্য ইয়ার পুরস্কার জিতেছেন টনি ব্লয়ের। ইগি পপ পেয়েছেন আইকন অব দ্য ইয়ার। এছাড়া উইমেন অব দ্য ইয়ার পুরস্কারটি গেছে কিম কারদাশিয়ানের ঝুলিতে।



রিভারকে ছাড়া রেড কার্পেট পানসে : সালমা হায়েক

মেক্সিকান অভিনেত্রী সালমা হায়েক বলেছেন, প্রয়াত অভিনেত্রী, কমেডিয়ান জোয়ান রিভারকে ছাড়া রেড কার্পেট আর সেই আগের মতো থাকবে না। পানসে হয়ে যাবে। সালমা মনে করেন, গ্র্যামার জগতের এ অনুষ্ঠানে জোয়ানকে সবাই দারুণভাবে মিস করবে এবং তার চলে যাওয়ায় হলিউডে এক বিরাট শূন্যতার সৃষ্টি হয়েছে। সালমা বলেন, এ ক্ষেত্রে তিনি ছিলেন একজন আইকন। তিনি হাসি-ঠাট্টাকে ফ্যাশনের অংশে পরিণত করেছিলেন। আমরা তাকে ভীষণভাবে মিস করব।



কলকাতায় মমতা ব্যানার্জির দেয়া সংবর্ধনায় বাংলা সংগীতের কিংবদন্তি নারী শিল্পী (নিচের সারিতে দাঁড়ানো, বাঁ থেকে) বনশ্রী সেনগুপ্ত, ফিরোজা বেগম, মমতা ব্যানার্জি, সন্ধ্যা মুখার্জি, নির্মলা মিশ্র, গিরিজা দেবী ও আরতি মুখার্জি। স্মৃতিময় এই ফ্রেম থেকে ক'দিন আগে হারিয়ে গেছেন শুধু ফিরোজা বেগম



সঞ্জীব হাউলী

সব্যসাচী লেখক সঞ্জীব হাউলী খুলনার সাহিত্য্যঙ্গনে এক সুপরিচিত নাম। সরকারি প্রতিষ্ঠানে চাকরি করেও থেমে থাকেনি তার সাহিত্যচর্চা। দীর্ঘদিন এমপ্লয়িজ ইউনিয়নে নেতৃত্বের পাশাপাশি লেখালেখির চর্চা চালিয়ে গেছেন বিরামহীন। সাহিত্যের নানা শাখায় করেছেন অবাধ বিচরণ। কবিতা, গল্প, প্রবন্ধ, ইতিহাস, গবেষণা কোথায় নেই তার পদচারণা? এ পর্যন্ত এই গুণী লেখকের প্রকাশিত গ্রন্থের সংখ্যা ৯টি। সর্বশেষ প্রকাশিত গ্রন্থটি নির্বাচিত প্রবন্ধের। এছাড়া তিনি একাধিক আঞ্চলিক পত্রিকার সাহিত্য সম্পাদক হিসেবেও দায়িত্ব পালন করছেন।

সাতক্ষীরার কালীগঞ্জ উপজেলার পাঁচবাড়িয়া গ্রামে জন্মগ্রহণকারী এ লেখকের পিতা ছিলেন একজন স্কুলমাস্টার। সঞ্জীব হাউলীর মানবিক গুণাবলি প্রশংসিত খুলনার সর্বমহলে। অনুকরণও করেন কেউ কেউ। সাহিত্য, সামাজিক সাংস্কৃতিক অঙ্গন এবং শিক্ষাপ্রতিষ্ঠানের সঙ্গে জড়িত থেকে পেয়েছেন অসংখ্য পুরস্কারও। তিনি বলেন, 'মানবসেবাই তার জীবনের আসল লক্ষ্য।'

—শুভ শচীন

নায়ক ব্রেট লি

টিভির পর্দায় ক্রিকেট ছেড়ে অনেক আগেই বিভিন্নভাবে মুখ দেখিয়েছেন। গিটার বাজিয়ে গান তো করেছেনই, অভিনয়ও করেছিলেন এর আগে। 'ভিক্টরি' নামের সিনেমায় একটি অতিথি চরিত্রে মুখ দেখিয়েছিলেন। এবার পুরোদস্তুর নায়কের ভূমিকায় নামতে যাচ্ছেন ব্রেট লি। গত বছর ভারতীয় শ্রেষ্ঠপটে অস্ট্রেলিয়ার বাজারে লগ্নির উদ্দেশ্যে সিনেমা নির্মাণের জন্য গঠিত হয়েছিল অস্ট্রেলিয়া-ভারত ফিল্ম ফান্ড। এ ফান্ডের প্রথম উদ্যোগ আনইন্ডিয়ান। আর এ সিনেমাটিতেই নায়কের ভূমিকায় দেখা যাবে ব্রেট লিকে। লির বিপরীতে নায়িকা হিসেবে থাকবেন ব্রিকলেনখ্যাত তানিষ্ঠা চ্যাটার্জি। প্রবাসী ভারতীয়দের নানা সাংস্কৃতিক জটিলতা নিয়ে এ সিনেমা পরিচালনা করবেন অনুপম শর্মা। ব্রেট লিকে নায়ক হিসেবে পেয়ে তানিষ্ঠাও বেশ খুশি।



এইট প্যাকের শাহরুখ

৪৮ বছরের শাহরুখ এবার এইট প্যাক অ্যাবস নিয়ে হাজির হচ্ছেন। কয়েক বছর আগে সিন্ধু প্যাক দেখিয়েছিলেন তিনি। ফারাহ খান পরিচালিত 'হ্যাপি নিউ ইয়ার' সিনেমার জন্যই এ পেশি তৈরি করেছেন শাহরুখ। তবে প্রকাশিত হওয়া ছবিতে শাহরুখের এইট প্যাক অ্যাবসের পাশাপাশি তার বয়সের ছায়াটাও যে শরীরে পড়েছে সেটা বোঝা যাচ্ছে। ছবিটি টুইট করে সঙ্গে শাহরুখ লিখেছেন, 'ফারাহ, আমাকে আর কাজে লাগিও না।' কমেডি সিনেমা হ্যাপি নিউ ইয়ারে শাহরুখের সঙ্গে আছেন দীপিকা পাডুকোন, অভিষেক বচ্চন, বোমান ইরানি প্রমুখ। সিনেমাটি ২৪ অক্টোবর মুক্তি পাওয়ার কথা রয়েছে।

আপনি জানেন কি

অজানা অক্ষয়

- অমৃতসরে জন্ম নেয়া অক্ষয় কুমারের আসল নাম পরি ওম ভাটিয়া।
- সিনেমায় নামার আগে ব্যাংকক গিয়ে মার্শাল আর্ট শিখেছিলেন। তায়কোয়ানদো'তে ব্ল্যাক বেল্ট পেয়েছেন।
- ব্যাংককে থাকার সময় শেফ ও ওয়েটারের কাজ করেছেন।
- বলিউডে অক্ষয়ের অভিষেক হয় ১৯৯১ সালে সৌগন্ধ সিনেমার মাধ্যমে।
- ব্যাংকক থেকে ভারতে ফিরে অক্ষয় মার্শাল আর্ট প্রশিক্ষণ দেয়া শুরু করেন। এক ছাত্র অক্ষয়কে মডেলিং করারও পরামর্শ দিয়েছিলেন।




- একবার এক বিজ্ঞাপনের শুটিং করার জন্য অক্ষয় ফ্লাইট মিস করেন। তখন এক স্টুডিওতে তার পোর্টফোলিও দেখে তাকে 'দিদা' সিনেমার নায়ক হিসেবে বাছাই করা হয়।

শিল্পার চোখে জল এনেছেন প্রিয়াঙ্কা

মেরি কমে প্রিয়াঙ্কা চোপড়ার অভিনয় দেখে চোখের পানি আটকাতে পারেননি শিল্পা শেঠি। প্রিয়াঙ্কার অসাধারণ অভিনয়ে মুগ্ধ-বিমূঢ় হয়েছেন শিল্পা। আবেগে জল নেমেছে চোখে। পরিচালক ওমাঙ কুমারের প্রথম সিনেমা মেরি কম। মণিপুরের বিখ্যাত প্রমীলা বস্ত্রার মেরি কমের জীবনীভিত্তিক এটি এক



অসাধারণ বায়োপিক। নিজের টুইটে এ বিষয়টি সবার সঙ্গে ভাগ করে নেন শিল্পা। প্রিয়াঙ্কার পাশাপাশি পরিচালক ওমাঙ কুমারেরও প্রশংসা করেছেন তিনি।



অভিনয় একাকিত্বের পেশা : ক্রিস্টেন স্টুয়ার্ট

টুয়েলাইট খ্যাত অভিনেত্রী ক্রিস্টেন স্টুয়ার্ট মনে করেন, তার পেশা একেবারেই নিঃসঙ্গ একাকিত্বের। এক মন্তব্যে তিনি বলেছেন, 'চারপাশের মানুষ ভাবে আমার সঙ্গে তাদের কথা বলার অনুমতি নেই। অভিনয়শিল্পীরা খুব বেশি বিচ্ছিন্ন হয়ে পড়েছেন। আমি এ নিয়ে অভিযোগ করছি না। তবে ব্যাপারটা হচ্ছে এমন যে, লোকের ভাবে এগিয়ে এসে তাদের আপনাকে হাই বলার অনুমতি নেই।'

লেডি গাগার দুবাইকরণ

দুবাইয়ের কনসার্টের জন্য প্রস্তুত লেডি গাগা। তবে দুবাইতে স্বভাবসুলভ উন্মত্ত ভঙ্গিতে দেখা যাবে না তাকে। অন্তত গণমাধ্যম তেমনটাই জানাচ্ছে। সেখানকার সাংস্কৃতিক আবহে নিজেকে মানানসই করে নিতেই দুবাইতে নিজেকে কিছুটা ঢেকে রাখবেন তিনি। তবে তাই বলে তার জৌলুস আর বিলাসিতা মোটেই কমবে না এই সফরে। যথারীতি হোটеле তার কক্ষ কালো এবং সোনালি শাটিন কাপড় দিয়ে সাজাতে হবে। থাকতে হবে এলটন জন, ডেভিড বোয়ি এবং কুইনের পোস্টার। ফুলদানিতে থাকতে হবে সাদা ও হলুদ গোলাপ এবং ল্যাভেন্ডার। সোফা হতে হবে সাদা চামড়ার। লেডি গাগার ড্রেসিং রুমে থাকতে হবে অক্সিজেনের ট্যাংক। আর লাগবে চিনাবাদাম, মাখনের সঙ্গে তিসি ও চার গ্রাম চিনি।



'পাইরেটস অব দ্য ক্যারিবিয়ান'কে গুডবাই নাইটলির

'পাইরেটস অব দ্য ক্যারিবিয়ান' ছবির আর কোনো পর্বে দেখা যাবে না কেইরা নাইটলিকে। টরন্টো আন্তর্জাতিক চলচ্চিত্র উৎসব চলাকালে এ সিরিজকে গুডবাই জানিয়ে একটু মজা করেই বললেন এ ব্রিটিশ অভিনেত্রী- 'আমাকে ছাড়াই জাহাজ ছেড়ে দিয়েছে। পাইরেটস অব দ্য ক্যারিবিয়ান ফাইভে থাকছি না আমি।' এ সিরিজের প্রথম তিনটি পর্বে গুরুত্বপূর্ণ ভূমিকায় দেখা গেলেও চতুর্থ পর্ব 'অন স্ট্রেঞ্জার্স টাইডস' থেকেই তাকে এ সিরিজে আর দেখা যাচ্ছে না। সিরিজটিকে গুডবাই জানালেও দ্বিতীয় বিশ্বযুদ্ধের প্রেক্ষাপটে নির্মীয়মাণ নতুন সিনেমা 'দ্য ইমিটেশন গেম' নিয়ে দারুণ ব্যস্ত সময় কাটছে তার।

